

皇朝通志



皇朝通志卷八十一

食貨略一

臣等謹按洪範八政首舉食貨誠以足國裕民之本計王者所必有事也洪惟我朝聖神繼起樂利無

疆百物阜成府藏充裕臣等伏讀太宗文皇帝實錄曰朕承天垂佑財用饒裕當此之際我國家

新舊人等若不急加恩養更於何時養之大哉皇言卜世卜年之所由長也夫任土定地農事爲先

百數十年以來百姓安于耕鑿之常而土田日闢生齒日繁皆國家培養所致也世祖章皇帝定鼎燕

京盡除明季加派遼餉剿餉練餉之弊聖祖仁皇帝詔天下滋生人丁永不加賦世宗憲皇帝念

江浙賦重清釐減免並詳見賦稅門皇上愛養黎元普免正賦者三普免漕糧者再其他蠲除賑卹以萬萬計詳見蠲賑

至于河工海塘關係尤鉅聖祖親視河干大興築濬世宗特令修築高堰海塘皇上翠華

臨蒞指示機宜於河工海塘不惜數千萬帑金爲一勞永逸之計詳見河渠門又如畿輔則特設莊田邊鎮則廣開屯

政錢幣之用則設局增鑄以酌錢直漕運之宜則官兌官收以速轉運鹽茶之權則加勛改引以裕商力平糶之

法則採聚截漕以平市直鴻模善政實開億萬斯年之美利夫人衆則財易生地廣則用益饒我國家受命之

初琉球諸國率先表貢東洋之銅佐京局之鼓鑄暹羅之米資邊海之倉廩迨至回疆式廓度地開田因中置

市向所謂重譯不能至者今悉爲內地山河其他小弱附景待澤又不足論蓋溯禹貢經畫九區作賦錫貢以來

從未有如此實大洪遠也今恭纂皇朝通志謹于鄭志篇目分併增省之爲十有二門敘次如左

田制上

崇德二年春

太宗文皇帝令各屯統領官督率兵民別土地高卑擇所宜以樹藝又

諭鎮守噶海

阿巴泰曰爾當令鎮守各官勸飭農事不可以天寒稍緩種植

世祖章皇帝御宇因明季變革版籍多亡田賦無準首著御史衛周祚巡行畿甸見正定府荒地十居六七請行清丈編審之法使地丁錢糧悉符實數而山東向遭流寇焚掠荒蕪尤甚河臣楊方興請以見在熟地爲數而荒棄者無論有主無主盡數除之

上可其奏旋即定開墾荒地之例凡州縣衛所荒地分給流民及官兵屯

種有主者令原主開墾又准河南拋荒地畝令鎮協官兵開墾其荒田三年起科其原熟而拋荒者一年供賦六年令地方官招徠逃民不論原籍別籍編入保甲開墾荒田給以印信執照永準爲業三年後察成熟畝數以勸墾之多寡論有司殿最時山海關外荒地特多八年令民願出關墾地者山海道造冊報部分地居住又以八旗退出晌地並首告清出地及各省駐防所遺地悉照墾荒例開墾十年以四川荒地聽兵民開墾官給牛種又令酌調步兵開陝西荒地又以直省州縣魚鱗老冊原載地畝區段坐落田形四至名目間有不清者印官親自丈量乃定丈量規制頒部鑄步弓尺於天下凡州縣用步弓依秦漢以來舊制廣一步縱二百四十步爲一畝各旗莊屯田用繩每四十二畝爲一繩是謂繩地令有司乘農隙率里甲履畝丈勘以定疆界然開墾既多數溢於舊有司中有以大畝當小畝又或田不加闢而貪冒議敘則又有以小畝當大畝者其後十五年

命御史二

員詣河南山東率州縣履畝清丈分別荒熟實數其地畝繩尺悉遵舊制又以山東故明藩田有相沿以五百四十步爲一畝者令照民間地例槩以二百四十步爲一畝凡各省畝數不均者悉令地方官踏丈改正十八年巡按河南御史劉源濬言南陽汝寧荒地甚多恐耕熟後有人認業遂起訟端雖三年起科著有定例而開種之初



雜項差役仍不能免嗣後請令該地方官先給帖文開列姓名年月並荒田四至坐落每歲申詳上司以憑爭訟寬徭役以恤窮黎借常平倉穀以資籽種各州縣仍以勸墾多寡定殿最部議如所請從之

康熙元年以山東民地錯雜竄地有在本省者有在直隸南皮鹽山縣者令巡鹽御史及地方官清丈各正疆界特諭直省有隱匿地畝不納錢糧及反圖冒功報爲新墾者州縣衛所官及該管上司分別處分是時海內初平人民未盡復業雖順治十五年開墾之例通行直省地廣人稀汙萊多有未闢者乃申地方官開墾勸懲之例其議敘例略如前而又戒凡州縣衛所荒地一年內全無開墾者督撫題參其已墾而復荒者削去開墾所加紀錄如前任官墾過熟地後任官復荒者照例議處以康熙二年爲始寬限五年如六年之後察出荒地尙多將督撫以下分別議處其同知通判不與知府同城自勸民開墾者照前州縣例議敘其後又准貢監生員民人墾地自二十頃至百頃以上者試其文藝通否酌量以知縣縣丞百總武職等官用復採川湖督臣蔡毓榮言蜀省可墾之地敕現任文武官員招徠流民三百名以上安插得所墾荒成熟者不論俸滿卽陞其各省候選佐雜及舉貢監生有力招民者授以署縣職銜俟起科時實授本縣知縣其開墾之限始定五年旋即有停止限年之令又有取具里老無包賠甘結始准議敘之令所以杜捏報攤派之弊也其起科之例 國初定制准以三年

聖祖軫念黎元尤爲備至十年准予三年後再寬一年十一年令寬至六年之後十二年復寬至十年及至十八年始復六年起科之例二十七年以徐州淮安鳳陽三處瀕河之地屯田累民永行停止二十九年以川省荒地甚多凡流寓願墾荒居住者將地畝永給爲業三十二年以西安等處流民復業 命布政使每戶給牛一頭並犁具穀種雇覓人工之資三十三年以福建沿海界外田地歷來界址混淆至是 將福州府

之閩長樂連江羅源興化府之莆田仙遊泉州府之晉江南安惠安同安漳州府之龍溪海澄詔安福安福德等縣及福寧州沿海地概行清丈三十八年以湖廣幅員遼闊履丈難徧先令民自丈出首然後官查抽丈四十年以山東明藩地募民墾種給印帖爲恆業四十四年准湖北民人願墾荒者本省文武官捐給牛種又以湖廣省屬大半濱江凡有修築隄地方官將隄身所壓及就取土之地丈明畝數估價攤銀補償本主四十五年丈出濱江蘆洲地畝三千七十餘頃皆係新淤泥灘草地定爲下則起科四十六年以閩省拋荒田二千六百餘頃至今尙未足額令勒限一年照數墾足五十一年

諭湖廣四川巡撫嗣後湖廣人民往四川種地者該撫查明年貌姓名籍貫造冊移送四川察核有自四川回湖廣者四川巡撫亦照此移送湖廣查對又

諭山

東民人到口外耕種者來往亦如之

按是時湖廣民人多典賣產業羣往四川至五年川省起征復回湖廣將原賣產業爭告故有是

諭

五十二年又因原任

偏沅撫臣潘宗洛所奏湖廣荒地五百餘頃恐未稱實遣官就疏內所有州縣查勘具奏五十二年准甘肅村堡之中有荒地未種者撥與無地之人耕種並動庫銀資給牛種五十五年以陝西赤斤達里等處荒地甚多招民捐墾

雍正元年

特諭開墾水田以六年起科旱田十年起科又

諭向來開墾之弊自知縣至督撫需索

陋規致墾荒之費浮於買價百姓畏縮不前往往荒棄膏腴之地嗣後各省凡有可墾之處聽民自墾自報官吏不得勒索阻撓戶部因議山西河南山東等處閒曠之地令督撫轉飭各州縣衛所確查有無從前種地之人勸諭開墾無力者官仍給牛種起科之後給印照承爲世業又以瀕江近海之地向例十年清丈恐未及期有坍塌者令各州縣衛所官不時清丈坍塌者卽行豁免漲者卽行升科乃稽古田畷之義

敕令有司於每鄉中擇

一二老農身無過舉者給八品頂帶以示獎勵督撫率府州縣並行勸課之典時西寧布隆吉爾地方遙遠赴墾者少議將直隸山西河南山東陝西五省軍流人犯連家口坐遣之人有能種地者到日地方官撥給地畝給與牛種照例三年起科四年設張家口外同知一員管理口外地畝分爲十分限年招墾五年令直省州縣勸民於村坊樹桑粟於河堤種楊柳陂塘淀澤種菱藕畜魚鳧每歲地方官將村坊種樹之數申報上司先是開墾地畝隱匿之罪甚嚴在奸吏猾民恐一經首出勢必追究是以多方欺護至是山東撫臣奏首出向來官民隱匿未報之地千七百頃於是寬免向來侵隱之罪令再展限一年聽其首報計先後開墾丈量之地較康熙年更擴焉是年以各州縣荒地有難於墾復者

令該督撫核實聲明仍飭屬設法開墾不入年限之內又准雲貴兩省廣行開墾凡地方招募開墾及官生捐墾者按戶數多寡議敘其民間自墾者俱給爲世業又以江南新淤膏地數千頃自安河淀至水家墩一帶差員履畝丈勘其山陽鹽城二縣丈出海口新涸之地六千餘頃分別年分均給士民六年以寧夏東北察汗託輝地延袤百有餘里其地平衍可墾爲田遣大臣會同督撫濬治河渠召民墾種凡陝西無業民戶願往者計程途遠近給與路費每戶按百畝以爲世業又以浙江温州府之玉環山孤懸海外設同知一員駐其地招民開墾先是四川苗民不知開墾之法令擇湖廣江西在蜀之老農給以衣食使教之耕其已墾地畝向未清釐至是

特遣科道等官親往丈量事竣計算入川民人酌給水田三十畝或旱田五十畝若有子弟及兄弟之子成丁者每丁水田增十五畝旱田增二十五畝實在老少丁多不能贍者臨時酌增除撥給成數外或有多餘三五畝之地亦准一並給墾其零奇不成坵段之處就近酌量安置執印照爲業十二年以廣東高雷廉瓊等處平陂山麓及沿海一帶緣粵人不習種旱田以致地有餘利乃選山東河南善種旱

田者往教之又以江南江西湖廣等處蘆洲坍塌靡定定例五年一丈而官吏往往藉此納賄行私致已坍者不得豁除正賦新漲者反可脫漏升科令該撫於屆期丈量選省道員中賢能夙著者率同州縣履畝清查凡有盈縮均按見在實數升除時直省有寄莊寄糧之弊而里籍戶口亦未盡畫一至順莊編里之法行而地土錢糧里籍俱有統紀矣

乾隆元年

詔直省報開荒畝段必實係新墾然後准其具奏誠恐有司以陞科之多迎合上司之意而督撫

以廣墾見長名為開荒實則加賦也二年

諭部會同九卿悉議勸耕之法戶部因言倣周禮遂師之制令州

縣擇鄉民之熟諳農務素行勤儉爲閭閻信服者量設數人以爲董率地方官考績之法必寬以歲月庶無欲速不達之弊如勸戒有方該督撫於三年之後據實題報官則交部議敘老農量加獎賞三年以江南常州府屬坍塌田地五年清丈之例從未舉行至是令遴員履畝確察升免實數造冊題報上於濱海田土坍塌靡定者

無不加

恩豁免卽凡各省報出隱匿地畝應起科者亦必再飭督撫據實清覆惟恐有勒令灑派之弊至於

新墾地畝尤必勘明上中下三則而於邊省內地無論山頭土角及河濱溪畔但可以開墾者悉聽民人墾種並嚴禁豪強爭奪故二年定承墾荒地之令五年復定直隸承墾官民地之例其制荒地則必先行呈報如土著呈報在先卽准土著承墾流寓承墾在先卽准流寓承墾凡官地承墾者亦以其呈之先後爲定民地先令業主墾種如業主無力始許他人承墾成熟之後業主亦不得追奪時河南巡撫雅爾圖言豫省旱田可改水田者尙多祇以旱田賦輕水田賦重一經改種必須題請加賦小民既費工本又增糧額未免因循觀望上諭以河南民願將旱田改爲水田者仍照原地科則又准湖北旱田願改水田者亦照豫省例行六年戶部議定陝西無主



荒土官爲插標招墾給照爲業竣升科之年核明等則酌定糧額通報若本地人力無餘准令鄰近無業之民承墾給照之後卽編入土著保甲之內令該管保長等稽察其平衍易收之地每一壯丁授地五十畝山岡沙石難收之地每一壯丁授地百畝如父子兄弟均係壯丁酌量加增其現在割漆砍竹採取木耳等項聽民自便地方官不得目爲荒地強令墾種亦不得以見獲微利勒報升科至七年又議陝甘各屬開墾之始小民畏懼差徭藉紳衿報墾自居佃戶追相傳數世忘其所自業主子孫輒欲奪田換佃而原佃之家忿爭越控靡有底止因著定例凡佃戶係原墾之子孫業主不得擅奪如業主之子孫欲自種者准將肥瘠地畝各分一半立券報官如耕主他徙承種之戶久已應差納課卽業主子孫回籍亦不全令給還其過三十年以外者墾不分給十一年以廣東高雷廉等府屬礮瘠居多開墾非易百姓未霑收穫之益先慮正賦之加是以未墾者聽其荒蕪卽已承墾者亦生畏縮遂令三府荒地聽該地民人墾種墾免升科永爲世業而瓊州爲海外瘠區其中可墾荒地二百餘頃召民開墾亦照高廉之例二十六年復募民間承種廣州威魯堡地畝又准開墾山西大青土默特千五溝地畝二十九年淮安西府屬招墾地畝又准四川屏山縣大竹堡等處招民開墾三十一年

上以滇省山多田少水陸可耕之地俱經開墾無餘惟山麓河濱尙有曠土而定例山頭地角在三畝以上者照旱田十年之例水濱河尾在二畝以上者照水田六年之例均以下則起科倘遇地方官經理不善一切丈量查勘不免胥吏滋擾乃令滇省山頭土角及水濱河尾之地俱聽民耕種概免升科嗣經戶部議奏凡內地及邊省零星地土以此爲推如直隸江西爲數不及二畝福建及江蘇之蘇州等屬不及一畝浙江及江蘇之江寧等屬不及三畝陝西不及五畝安徽湖南湖北貴州水田不及一畝旱田不及二畝河南上地不及一畝中地不及五畝下地不論頃畝山東



中則以上地不及一畝中則以下不論頃畝山西下地不及十畝廣東中則以上水田不及一畝旱田不及三畝下則水田不及五畝旱田不及十畝四川上田中田不及五分下田上地中地不及一畝下地不論頃畝雲南不計畝數廣東之奇零沙磧地畝及高雷廉三府山場荒地俱永遠免其升科奉天十畝以下尙宜禾稼者減半徵租山岡土阜傍河濱海窪下之處不成坵段者永免升科是年總計天下土田七百四十一萬四千四百九十五頃五十畝有奇自後續報開墾地畝區數三十七年江蘇鹽城縣報墾田一百四十八頃四十七畝江西宜春泰和玉山鉛山鄱陽德化六縣報墾田五頃六十三畝廣西臨桂歸順興業三州縣報墾田一頃八十四畝三十八年戶部議佃墾事宜 上復命總督周元理於直隸所屬派遣府大員董率守令如前奉行明年元理奏順天永平保定遵化四府墾熟地六十三頃三十畝易州廣平縣墾荒地一頃七畝四十年廣西太平思恩府屬報墾水田一十五頃八十八畝四十四年周元理又報順天府屬十州縣共墾地一百五十六頃三十一畝天津府靜海縣墾地十三頃八十五畝五十年 上諭直隸所報河灘荒地過多令戶部派賢能司員會同直隸道府勘可開墾者勸佃召墾

皇朝通志卷八十二

食貨略二

田制下

順治元年近畿百姓帶地來投者甚多

上特命設爲納銀莊頭各給繩地每四十二畝爲一繩其納蜜葦棉靛等物

附焉計立莊百三十有二不立莊者仍其戶計二百八十有五分隸內務府鑲黃正黃正白三旗坐落順天保定

河間永平天津正定宣化等府州縣其奉天山海關古北口喜峯口亦

命次第設立旋

諭戶部清

釐近京各州縣無主民田及故明勳戚駙馬公侯伯內監無主莊田分給諸王勳臣兵丁人等先行經理疆界令滿漢分居于是順天巡按柳寅東上言無主地與有主地犬牙相錯勢必滿漢雜處不惟今日履畝之難亦恐日後爭端互起莫若先按州縣大小定用地多寡使滿洲自住一方然後稽察無主與有主地畝互相更換庶經界分明疆理各正乃定圈撥之法以尙書英俄爾岱董其事越明年

上以民間田房聽旗人指圈其間美惡

不一恐官吏瞻情致居民偏累乃

諭戶部務從公速撥其有不齊者均平補給之又

命給事中四

員御史四員戶部司官八員分往各州縣公同撥給凡民間墳墓在所圈地內者許其子孫隨時祭掃所有應給滿洲與應給民間地畝令地方官曉示無妨東作明年又定民田被圈者以各州縣連界地畝撥補不願他適者以未圈之民房地均分居住耕種至其授地分數初定王貝勒貝子公等于錦州各設莊一所蓋州各設莊一所額外各莊均令退出嗣又定給王貝勒貝子公等大莊每所地四百二十畝至七百二十畝不等半莊每所地二百四十至三百六十畝不等園每所地六十至二十畝不等其內務府總管給園地四十八畝親王府管領給園

地三十六畝郡王以下府管領給園地三十畝王以下各官所屬壯丁亦給地三十六畝停支口糧各府給事人

員給地各有差又定副都統以上官各給園地百八十畝地六十畝四年定參領以下官各給二名壯丁地三十名

畝凡官兵地以茲爲額兵則增丁不加減丁不退官則陞遷不加己故革除不退五年酌定親王給園十所郡王

給園七所每所地一百八十畝六年定襲封王貝勒貝子公等其祖父所遺園地除撥給應得之數外餘地仍留

本家公侯伯各給園三百畝子二百四十畝男一百八十畝都統尙書輕車都尉各一百二十畝副都統侍郎騎

都尉各六十畝一等侍衛護衛參領各四十二畝二等侍衛護衛各三十畝三等侍衛護衛雲騎尉各二十四畝

凡官員致仕者督撫布按總兵各給園地三十六畝道員副將參將各二十四畝府州縣遊守等官各八十畝新

來壯丁每名給地三十畝凡加封王貝勒貝子公等園地悉照本爵撥給七年定給公主園地各三百六十畝郡

主各百八十畝縣主郡君縣君各百五十畝又酌定給親王園八所郡王五所貝勒四所貝子三所公二所每所亦百

八十鎮國將軍二百四十畝輔國將軍百八十畝奉國將軍百二十畝奉恩將軍六十畝嗣後凡初封王貝勒貝

子公等俱照此爲額其鎮國將軍以下已給園地者停給家口糧米又定八旗舊壯丁每名撤地六畝撥給新來

壯丁十一年都察院言滿洲兵丁出征必需隨帶之人雖有分土往往失耕一遇旱澇仍需部給口糧請查壯丁

四名以下所得地土盡數撤出量加錢糧月米從之

康熙二年定新來佐領給地三十畝領催地十八畝尋又設守衛

副管以下各有差八年

諭戶部將本年所圈房地悉還民間按圈撥之令順治年間已經停止嗣後有因旗下退出荒地復行圈補者有遊牧等處投

來人丁復行圈撥者有因圈補時其無地旗人令於古北口邊外空地撥給耕種尋以貝勒大臣議奏張家口殺

虎口喜峯口古北口獨石口山海關外曠土實多如宗室官員以下願將壯丁地畝退出取口外閒地耕種者令都統給印文咨送按丁分給二十年定新滿洲來京歸旗者停給園地二十四年議定各處壯丁及新滿洲應給

地畝

令於上三旗內務府及八旗禮部光祿寺丈量餘地撥給

此外又有部寺官莊分隸禮部光祿寺各衙門以給公用毋指園百姓

墾荒地至於內務府莊地先是量地編爲四等每莊壯丁十名立一人爲莊頭給田一百三十晌

每六畝爲一晌場園馬

館另給田四晌房舍牛具皆給焉至是設爲糧莊每莊給地三百晌後又增壯丁爲十五名其撥給莊頭地土祇

令於各屬退輪租地內勻撥禁指園民地

按內務府官莊糧莊外有白豆槽莊曰半分莊曰稻莊曰菜園曰瓜園曰果園又曰蜜戶蠶戶棉院戶俱設壯丁莊頭另給莊頭地畝

雍正二年以內務府交出餘地及戶部所收官地內撥新城縣一百一十六頃固安縣一百二十五頃八十畝制

爲井田選無業旗人滿洲五十戶蒙古十戶漢軍四十戶每戶授田百畝八百畝爲私田百畝爲公田餘地設立

村莊造廬舍四百間每戶給銀五十兩爲口糧牛種之用於八旗廢官內各簡選一人爲領催五年以八旗滿洲

蒙古內欠糧及革退官兵無恆業者發往耕種井田令管理井田官嚴行約束其開戶人犯法者給與井田中効

力善賈之旗人爲佃丁後又於順天府之霸州及永清縣設立井田六年清查直隸旗地時以旗民雜處往往互

相爭佔議令內務府宗人府八旗都統將旗莊園賞投充各項地數明坐落四至造具清冊一送戶部一送直隸

總督照式造冊鈐印發各州縣存貯以便查察七年

諭旗人產業向例不准典賣與民相沿已久竟有私

賣者從寬免究飭各旗一一清出請支內庫銀照原價贖出留在該旗限一年令原業主取贖如逾限不贖不論

本旗別旗准其照價承買十二年以旗地坐落直隸各屬片段錯落無由知其確數議令八旗都統各委參領一

人於農隙時會同直隸州縣履畝清丈十三年

遣官清丈察哈爾東西四旗地畝又

諭旗人欺隱



餘地俱令自首免罪又清釐園頭牲丁壯丁人等私賣當差地畝照內務府紅冊徹底清查本係官物均應撤回如屬私業不應強撤

乾隆元年改井田爲屯莊以試行十年未見成效 令地方官確查實力耕種者改爲屯戶每戶給田百二十

五畝禁其私典各屯戶身故有子者准予子補其無子及緣事歸旗者原領田房撤出若守節之婦仍給養贍田四十畝二年 上以旗人生計貧乏者多 令王大臣將入官地畝立爲公產收租息按旗分給以贍貧乏

向例官用旗地在入官地內動撥今既立爲公產未便再行動用議令直屬有駐防旗人交出在京所受之地及各莊退出之地與八旗丈出餘地絕戶無人承業地凡一切當差官項應得地畝統於此項動撥又定凡工程所用旗地方官於興工日清釐畝數咨明補給三年 諭八旗入官地有原圈官地有旗人自置之地若以入

官之後概定爲公產不准民贖殊非軫念畿輔黎赤之本懷嗣後除原圈地外如係旗人置買民間者准照價變賣將價銀交各旗生息分給旗人四年八旗大臣議借庫銀於京城空地蓋造房屋賞無房人居住將公產租息陸續補庫其續收地租作何賞給別議具奏 上以此項地畝既賞還旗人仍留公官辦不但所得地租分散

之時勢難均齊亦恐官收少於私收分賞衆人無濟於事仍 令八旗官兵量力承買爲業其承買價銀卽交

部以補蓋房之項著該部會同八旗大臣酌量等第別定價直詳明議奏于是戶部八旗都統分定等第估計價

直令官兵承買其價銀限五年交完有指俸抵買者亦限五年內坐扣其地價餘銀稅地方官將民典旗地贖回

報部 上諭戶部曰民典旗地輾轉相授閱年久遠已成故業今遽贖回必於民間全無擾累始爲妥協再貧

乏兵丁食餉有限無從措價勢必盡歸富戶則贖地一事恐未必於貧乏旗人有益著戶部行文直隸總督詳悉

妥議越明年直隸總督議奏取贖旗地百姓不苦於得價還地實懼其奪田別佃應令贖地之時將見在佃戶及見出租額造冊備案嗣後無論何人承買仍令原佃承種至民間有在旗地造房立墳者只令丈明畝數照例輸租不許勒令遷移又贖回民田與八旗公產及入官地不下數千萬畝應詳察八旗閒散人內有正戶正身居家勤儉者令挈妻子下鄉耕種按等分給初種之年官給牛種房舍之資又覆議耕種旗丁仍令簡選當差初下鄉屯種時每戶給房四間每間折銀十兩每名給牛具籽種銀百兩如承買公產人等有願令子弟耕種者亦照此辦理厥後復屢定典賣公產之禁十一年議定取贖旗地以十年爲率十年內給原價十年外減原價十之一以次按年遞減至五十年以外均以半價令原業主取贖如原業主不願回贖准各旗官兵照減價認買是時八旗公產有未經承買及存退餘絕地計六千四百餘頃原議酌留千頃爲各案撥補之用每年官收租息爲數既輕吏胥遂有包攬浸漁之弊議令履畝詳勘量地肥瘠編設莊頭地美者整莊照例給十八頃半莊給地九頃瘠薄者量增十八年定旗下奴僕及開戶人典買旗地限一年內自首照民典旗地例分年限減價官爲贖贖如原主不能贖卽交內務府作爲公產賞給貧旗嗣後凡民典旗地俱交該旗作爲公產歸入此案賞給貧旗停止召買

二十一年

諭八旗另記檔案及養子開戶人等出旗爲民所有本身田產並許帶往尋議旗人契買民田並

開墾地畝係本身私業准其帶往至於老圈並典買八旗地畝仍請動官帑歸贖又以新滿洲當差人員停止撥

地照地給與租銀

按開後於二十九年戶部奏各旗遺年得地之新滿洲人等亦令退地領租

二十二年直隸督臣清出候贖旗地一萬四千餘頃戶

部因請先行發帑贖回交八旗都統照旗地旗租例收租歸帑又以八旗存退餘絕地照例仍留一千頃撥補官用餘俱安放莊頭二十三年 諭出旗爲民之漢軍所有舊承種井田屯田俱令帶入民籍二十七年戶部議

八旗積存地畝仍請分設莊頭 上以設莊不過三四千頃所餘尙多此等皆係老圈旗地且發帑贖回者十居七八著交內務府派員經理俟原帑歸清後卽賞給八旗作爲恆業其將來如何妥協辦理之處著戶部會同內務府八旗大臣悉心議奏尋定以三千頃安設莊頭餘俱賞給八旗越明年 上以此項田產雖係旗人世業而傭佃農民耕種日久改歸莊頭未免失業遂停分設莊頭之令三十六年定留京當差之新滿洲官兵以舊撥地畝有照地管業者仍令自行收租其退地領租者仍照原定等次減半折給其折租地數如留京一年內陞轉者以陞銜計一年外陞轉者仍以原銜計此後再有陞降不另增減其租屆期戶部於直省徵解旗租內動款交該旗散給四十四年 諭八旗贖回入官老圈地節經更定仍准官員兵丁分買今計畝浩繁其認買地畝若離京在數百里外必致紛紛告假取租不惟徒費資斧又啟民人勒捐之端其地租未定能否全得反將所得錢糧先行坐扣地價於旗人生計全無裨益不如仍令官爲取租解部分給八旗賞資兵丁交戶部八旗均勻分給

皇朝通志卷八十三

食貨略三

賦稅上

順治初年

世祖章皇帝軫念民生力除明季加派積弊

詔言前朝厲政莫如加派遼餉以致民窮

盜起而復加剿餉再爲各邊抽練而加練餉惟此三餉數倍正供更有召買糧料名爲當官平市實則計畝加徵乃令自順治元年始凡正額之外一切加派盡行蠲免如有官吏朦朧混徵暗派者殺無赦時巡按御史柳寅東建言解京錢糧頭緒紛雜有一縣正額止三千餘兩而條分四十餘項有一項錢糧祇一兩六七錢而加費至三十兩宜總計各款彙解以杜賠累山東巡撫方大猷亦請清釐錢糧款目並刻由單使民易曉御史甯承勳又請飭所部於賦役全書外給易知由單一應無藝之徵通行裁革而御史衛周祚見正定府荒亡請亟行編審之法使丁地稅糧得符實數又緣明季內官縱恣紳衿優免逾額部臣議將各廠地租照御用監近例歸併有司徵解巡撫王文奎請革優免舊習黜小民取盈攤派之困其言並見

採用于是首令直省文臣齎錢糧冊籍

以朝禁天下徵收錢糧毋得于額外加火耗以故明內監地畝錢糧總歸戶部管轄二年

諭凡前朝宗室

祿田散在直省者與民間一例起科三年

特遣大學士馮銓與公英俄爾岱往戶部察核錢糧原額在京

責成各管衙門在直省責成撫按彙造賦役全書頒行天下是時天下財賦最重之區莫如江南江西浙江三省而蘇松嘉湖諸府尤最撫臣黃徵請以漕白二糧與歲貢絹布俱官兌官解以紓民累江西南昌瑞州袁州三府荒地浮糧懸欠日久巡按黃贊元請丈出荒地永行豁免其近山易旱近水易潦者上則改爲輕則俱從之是年



革太平府始溪橋米稅金柱山商稅安慶府鹽稅以明季所增也六年殞易知由單將各州縣衛所額徵起運存留本折分數漕白二糧及京庫本色俱條悉開載通行直省按戶分給又

特諭戶部設關以寓譏察非專

與商賈較量錙銖爾部亟行文各關差員悉照原定則例起稅如有徇情權貴放免船隻乃於商船增收或希充私案例外多徵者罪七年定衛所屯田科徵先是衛所屯田分給軍丁因有操練城守捕盜領運之責科徵較民田輕減至是裁汰衛軍凡有運糧衛所仍舊徵收其無運衛所照民田起科八年

命御史分巡各省察民

閭閻病蘇松巡按秦世禎因條上興除八事一田地令業主自丈量明注印冊以清花詭一額定錢糧俱填易知由單設有增減另給小單使奸胥不能藉口一由單詳開總散數目花戶姓名以便磨對一催科不許濫差衛役設立滾單以次追比一收糧聽里戶自納簿櫃俱加司府印封以防奸弊一解放以緩急分先後勒限掣銷不得分毫存留衙役之手一民差查田均派與排門冊對驗無使苦樂不均一備用銀兩概從節省不得透支令各布政司每季提徵解原冊年底報部扶同容隱者罪從之先是戶工二部十九處關津每關專差戶部漢軍官一員督管稅務嗣後增設滿洲官一員漢軍官一員關差員數遞增書吏多行不法甚至沿河盤貨商賈畏蹢不前上深知其弊著仍舊每關設官一員其添設者悉行裁去九年定直省典鋪稅例在外當舖每年徵稅銀五兩其在京當舖並各鋪該順天府酌量鋪面徵收又以廣東屯糧全征本色未免苦累屯丁令本折各半徵收十年以江南秣陵廣武英武三衛屯糧路隔長江輸糧不便准其折色又令各關口刊刻定例設櫃收稅不得勒扣火耗需索陋規並禁關役包攬報單十一年戶部請訂正賦役全書又請如明制令各布政使或三年或五年將人丁地土繕造黃冊以便稽查隙地漏糧之弊時戶科給事中杜薦祐條奏關弊四事一裁吏役一查稅累一關